

LIGJ
Nr. 8292, datë 25.2.1998

PËR FORCAT SPECIALE DHE ATO TË NDËRHYRJES SË SHPEJTË
(Ndryshuar me ligjin nr. 8751, datë 26.3.2001)

(I përditësuar)

Në mbështetje të nenit 16 të ligjit nr.7491, datë 29.4.1991 “Për dispozitat kryesore kushtetuese”, me propozimin e Këshillit të Ministrave,

KUVENDI POPULLOR
I REPUBLIKËS SË SHQIPËRISË

V E N D O S I:

KREU I
DISPOZITA TË PËRGJITHSHME

Neni 1
(Ndryshuar me ligjin nr. 8751, datë 26.3.2001)

Forcat Speciale dhe ato të Ndërhyrjes së Shpejtë janë struktura të specializuara të Policisë së Shtetit, të krijuara për të realizuar misione ndërhyrjeje dhe sigurimi, ekzekutimi i të cilave kërkon personel të përgatitur dhe të pajisur në mënyrë të posaçme.

Neni 2

Forcat speciale dhe ato të ndërhyrjes së shpejtë gjatë ushtrimit të detyrës, zbatojnë me përpikëri dispozitat kushtetuese, kërkesat e ligjit dhe respektojnë e mbrojnë të drejtat dhe liritë e shtetasve.

KREU II
ORGANIZIMI I FORCAVE SPECIALE DHE ATYRE TË NDËRHYRJES SË SHPEJTË

Neni 3
(Shfuqizuar me ligjin nr. 8751, datë 26.3.2001)

Neni 4
(Ndryshuar me ligjin nr. 8751, datë 26.3.2001)

Pjesëmarrësve të Forcave Speciale u garantohet fshehtësia e identitetit gjatë ndërhyrjes dhe pas saj.

Fshehtësia e identitetit u garantohet edhe Forcave të Ndërhyrjes së Shpejtë, kur veprojnë në operacione si Forcat Speciale ose në ndihmë të tyre.

Neni 5
(Ndryshuar me ligjin nr. 8751, datë 26.3.2001)

Forcat Speciale dhe ato të Ndërhyrjes së Shpejtë janë forca të gatshme të Policisë së Shtetit.

Veprimtaria e këtyre forcave shtrihet në të gjithë territorin e Republikës së Shqipërisë.

Neni 6

(Ndryshuar me ligjin nr. 8751, datë 26.3.2001)

Aktivizimi në shërbime i Forcave Speciale dhe i Forcave të Ndërhyrjes së Shpejtë bëhet me urdhër të Drejtorit të Përgjithshëm të Policisë së Shtetit.

Në raste të veçanta, kur kërkohet përdorimi masiv i këtyre forcave, Drejtori i Përgjithshëm i Policisë së Shtetit merr miratimin me shkrim të Ministrit të Rendit Publik.

Forcat Speciale dhe ato të Ndërhyrjes së Shpejtë përdorin armë zjarri, mjete dhe pajisje të posaçme për përmbushjen e detyrave të caktuara nga ky ligj.

KREU III

DETYRAT E FORCAVE SPECIALE DHE ATYRE TË NDËRHYRJES SË SHPEJTË

Neni 7

(Ndryshuar me ligjin nr. 8751, datë 26.3.2001)

Detyrat funksionale të Forcave Speciale janë:

- Lirimi i pengjeve në kushtet e sigurisë më të lartë.
- Ndërhyrja kryesisht në mjedise urbane për ndalimin, arrestimin, neutralizimin e personave pjesëtarë të organizatave terroriste e kriminale, të bandave të armatosura, si dhe të çdo personi tjetër të armatosur ose që ka kryer një krim me armë.
- Ndihma ndaj popullatës në raste fatkeqësish të rënda natyrore e aksidentale, vetëm kur kjo është mundësia e vetme për shpëtimin e jetës së njerëzve.

Neni 8

(Ndryshuar me ligjin nr. 8751, datë 26.3.2001)

Detyrat funksionale të Forcave të Ndërhyrjes së Shpejtë janë:

- Sigurimi i rendit gjatë veprimtarive masive publike, në raste fatkeqësish të rënda natyrore dhe fatkeqësish të tjera, të cilat mund të shoqërohen me prishje të rendit.
- Sigurimi i rendit në akset rrugore kombëtare në rastet kur në to ka veprimtari të bandave e grupeve të armatosura.
- Marrja në ruajtje e objekteve të rëndësishme shtetërore dhe social-ekonomike, kur ka të dhëna për sulme me armë ose pa armë ndaj tyre, në qoftë se forcat e caktuara për këtë qëllim nuk janë në gjendje t'i ruajnë.
- Shoqërimi i personave të rrezikshëm në gjykata, burgje, dhoma paraburgimi, kur ka të dhëna për përpjekje për lirimin e tyre.
- Ndërhyrja për rivendosjen e rendit të prishur nga akte të rënda dhune në të gjitha mjediset publike, kur forcat e policisë vendore nuk janë në gjendje ta bëjnë këtë.
- Ndërhyrja për ndalimin, arrestimin e personave të shpallur në kërkim ose që ndiqen nga policia, grupeve kriminale, bandave të armatosura, kryesisht në zona rurale, kur policia vendore nuk është në gjendje t'i kryejë vetë këto.
- Ndërhyrja për rivendosjen e gjendjes normale në burgje e dhoma paraburgimi në raste rebelimi masiv të të burgosurve.
- Ndërhyrja e operacioneve në ndihmë të popullatës në rastet e fatkeqësive të rënda

natyrore dhe fatkeqësive të tjera.

KREU IV TË DREJTAT E FORCAVE SPECIALE DHE TË ATYRE TË NDËRHYRJES SË SHPEJTË

Neni 9

Forcat speciale dhe ato të ndërhyrjes së shpejtë kanë këto të drejta:

1. Të hyjnë në zyrat shtetërore, me përjashtim të objekteve që ruhen nga Garda , në ato private ose të organizatave, në mjediset e tyre dhe në banesat shtetërore a private, në raste flagrante, për kapjen e autorëve të veprave penale që janë në ndjekje e sipër, si dhe për dhënien e ndihmës së nevojshme në raste fatkeqësish natyrore, aksidentesh dhe zjarri.

2. Të bllokojnë ose të rrethojnë pjesë të rrugëve, banesa, zyra e mjedise të tjera për nevoja të domosdoshme të kryerjes së detyrës.

3. Të shoqërojnë për në organet e ruajtjes së rendit personat që nuk pranojnë të paraqesin dokumente identifikimi, kundërshtojnë ose pengojnë forcat e ndërhyrjes së shpejtë gjatë kryerjes së detyrave, janë gjetur në vendin e ngjarjes dhe dyshohen se janë autorët e krimeve, mbajnë, përdorin dhe transportojnë lëndë eksplozive, narkotike e të tjera të kësaj natyre.

4. Të përdorin edhe armët e zjarrit për kryerjen e detyrave sipas kushteve të parashikuara nga dispozitat ligjore për përdorimin e armëve.

KREU V PRANIMI, KUALIFIKIMI DHE SHËRBIIMI I FORCAVE SPECIALE DHE ATYRE TË NDËRHYRJES SË SHPEJTË

Neni 10

(Ndryshuar me ligjin nr. 8751, datë 26.3.2001)

Pranimi në Forcat Speciale dhe në ato të Ndërhyrjes së Shpejtë bëhet sipas kritereve të përcaktura në ligjin nr.8553, datë 25.11.1999 “Për Policinë e Shtetit” dhe sipas kritereve të veçanta të përcaktuara në akte nënligjore.

Neni 11

Trajtimi i forcave speciale dhe atyre të ndërhyrjes së shpejtë, për natyrën e veçantë të shërbimit, bëhet me vendim të Këshillit të Ministrave.

Neni 12

(Shfuqizuar me ligjin nr. 8751, datë 26.3.2001)

Neni 13

(Ndryshuar me ligjin nr. 8751, datë 26.3.2001)

Punonjësve të Forcave Speciale dhe atyre të Ndërhyrjes së Shpejtë, kur kërcënohen për shkak të detyrës, u sigurohet mbrojtje e veçantë e jetës, familjes dhe pronës, në përputhje me kriteret e përcaktuara me vendim të Këshillit të Ministrave.

Neni 14

Ngarkohet Këshilli i Ministrave dhe Ministria e Rendit Publik të nxjerrin aktet

nënligjore në bazë dhe për zbatim të këtij ligji.

Neni 15

Ligji nr.7551, datë 22.1.1992 “Për forcat e ndërhyrjes së shpejtë” dhe çdo dispozitë tjetër që bie në kundërshtim me këtë ligj, shfuqizohet.

Neni 16

Ky ligj hyn në fuqi ditën e shpalljes nga Presidenti i Republikës.

**Shpallur me dekretin nr.2004, datë 27.2. 1998 të Presidentit të Republikës së Shqipërisë,
Rexhep Meidani**